

De schen Lois

De scheen Lois hat bei uns in dere Hauptgass gwohnt, er hat es greschti un schenschi Haus im Dorf ghat. Vore am Haus war a Bruschtmaur, un die ganzi Gassefront zamt mit der Bruschtmaur war mit glanzichi Kachlstaan verputzt. A Eisenes Tor un Tirl han die Grechtichkeit scheen ingrahmt. De Lois hat so viel Feld ghat, dass er manichsmol selwer net gwisst hat, wieviel Joch dass zu seiner Wertschaft ghere. Wann er awer in sei Familiebuch gschaut hat, wu alles drin gschrieb gstann is, dann hat mer ne ganz ruhich frooe kenne, weil dann hat er alles gwisst. Des war halt desweje, weil er ganz seltn mit seini Leit ufm Hottar mitgearweit hat. Des hat er jo net brauche, sei Großnecht hat alles so gut gmacht wie er selwer, er hat nor gsaat, wann un wie alles gmacht muss were. De schen Lois war langi Jahr Richter im Dorf, er war beim Gsangverein de erschte Vorstand, er war de Presesch bei dr Feierwehr, er war beim Frauen Verein im Vorstand- es hat sich ke Verein im Dorf ginn wu der Lois net es Saan ghat hat. Er hat aach als Mann gut ausgeschaut. un wann r dorch die Gass gang is, hat sich de Plaschter geboo. Do hann sich ziemlich alli Weiwer rum gedreht un han em noogschaut, vieli ware derdrunert, die sich aach so a Mann gwunsch hätte, wann er halt kumm wär. Un des hat de scheen Lois schun lang gwisst ghat, drum hat er aach khe Gelegenheit auslosst, schnausich war er net, bei dem Fall. Bloß eenmol soll es net so gang sinn, wie er sich s gwunsch hat. Wie er beim Nantschi, des um vieli Jahr jinger wie er war, dorch s Fenschter in s Zimmer schau hat wille, hat es Nantschi gment, des is der rotzich Natz, der ehm immer khe Ruh losst. Noh hat, s dem des Wasser in s Gesicht gschitt, des grad uf m Tisch gstann hat. De schen Lois hat sich do dedriwert gar khe Koppweh gmacht. Er hat des so rum gedreht, sowie wann er nor uf dr Gass gang wär, un wie er vor dem Mädli seim Fenschter langscht gang war, hat des ganz unvorsichtig es Wasser aus m Zimmer direkt uf die Gass gschitt un hat ihne ganz unschuldich getroff. Es Nantschi hat sich net getraut, vor des weiter verzähle, un so is dann Graas iwer des ganzi Gschicht gwachst. Un die Leit, was des mitgriet han, ware uf dr Meinung, dass des was es Nantschi naus gschitt hat, gar khe Wasser war. So a Dorfrichter hatt aach viel zu tun ghat un hat viel Verantwortung vor sei Dorf getraa. Er hat sich um die Nachtswächtere un Gornicke, um die Ross, Kuh - un Sauhalter kimmre misse. Er hat die Schofhaltre ufmerksam mache misse, dass se in khe Schade gehn derfe, er hat die Leit saan misse, dass se de Wassergrawe vor em Haus ausputze misse, un so vieles Anneres was so im Dorf vorgeht, hat er verantworte misse. Sogar bei ener Tanzunnerhaltung hat er s großi Wort ghat. Do ware die meischi Jungi Leit bees iwer ne ginn, wann er als um zwelf Uhr in dr Nacht, wie s am schenscht gang war, sei grume Stecker in die Heh ghob un gsaat hat,“ Feierowet vor die Mädle un Buwe“ Drum han die größeri Buwe, dem Richter, wie es mol greent hat, am spode Owet a Schnur gspannt, wu dann de Vettr Lois detriwert in de Dreck gfall is. Bees war er schun, awer er hat s net rausfine kenne, wer do dran die Schuld war. Die Jahre sin grad so schnell vergang wie vorher, un so is de schen Lois ach immer älter un vergeslicher ginn. Es is mol in eem Jahr im Herbscht passiert, dass er dem Kleenrichter, der wu aach im

Dorf getrummelt hat, de Befehl gin hat, dass r zum Knoflbauer gehn un ehm saan soll, er soll sei Strofgeld ins Gmeindihaus zahle kumme, weil sei Kuh vun dr Halt hemgloff is un in de Schaade gang war, un dem Groß Stefan soll er saan, das,r sei Weib aus m Bezirks Spital holle soll, weil die schon gesund is. Un Trummle soll er, dass am nächschte Taa a Kummision vun em Bezirk kummt, un alli Leit denni ihre Seideraube sich Inspinne, die selle sich sofort im Gmeindihaus melle. Weil die Leit aus der Stadt schaue wille, wie viel die Raube noch brauche, bis se fertich ingspunn sin. Awer weil der Kleenrichter in seler Zeit schon weit iwer sechzich Johr alt war, han beim Vetr Mischko, so hat der Kleenrichter gheeß -, die Ohre nimmi so gut funktionirt, wie frieher, er hat nimi so gut ghert. Un in dere Gschwindichkeit, die er immer ghat hat, hat er ach net so gut hienghorcht, Er is ins Dorf gang, un hat iwer de Knoflbauer gsaat, dass er sei Kuh aus m Spital holle soll. Un de Groß Stefan soll sei Strof ins Gmeindehaus zahle kumme, weil sei Weib im Schaade war. Un getrummelt hat r, dass alli Leit die spinne, morje in s Gmeindihaus kumme solle, weil vum Bezirk a Mann kummt, der se alli anschau will. Ob er des vun gere gmacht hat, hat er jo iwer niemand gsaat, awer de Spitzbuu hat er schon im Buse ghat, Do han sich die meishti Dorfsleit dedriwert geärchert, un han bei dr nächshti Richterwahl de Kruwlich Josep vor Richter gwählt. Der war jinger, un war phaar Johr in dr Ackerbauschul gwen. Der neie Richter hat sofort a jingere Kleenrichter ingsetzt, net dass nochmol so etwas vorkumme soll wie beim Vetr Mischko. De schen Lois hat dann sich phaar Johr um sei Wertschaft gekimmert, die was er schon länger seini Kinner iweginn hat. Un noh noch mol in phaar Johr druf, hat mer ne uf der Bank vor seim Haus sitze gsiehn, wu er mitm krumme Stecker die Gäns vertrieb hat, dass se net die ganzi Maulbiere uf fresse, die uff dr Gass im Gras gelee han, weil die doch zamm gerafft ginn sinn vor Racki brenne. Gar oft is es vorkumm, dass er bei dere Arweit ingschlof is un dernoh vun seini Kinner gschennt griet hat, die Gäns han halt a freie Laaf ghat. Oft denk ich mer so im Stille, es is doch gut, dass es do in Deitschland ke Maulbierebem uf dr Gass gibt, un ke Gäns, wu mer dann vertreiwe muss. Weil was em bevorsteht, wann mir mol älter ginn, wisse mer alli net.Un net iwerall steht a Gassebank vor em Haus.

Hans Niedermayer